

永新縣志卷十七

人物志

儒行

唐

龍况字景荀父庚任吉水丞後避寇永新因家焉况穎敏博貫經史為時名儒唐光啓間鄉舉龍紀間任大理評事居官仁廉歿遇異僧卜葬義山鹽堆子五人欽城琮瑤琳咸以科名顯邑號鹽堆龍云萬歷志

按萬歷志誤以庚為况祖任茶陵令今從萬姓通譜及龍鐵之世系攷更正

永新縣志

卷十七

人物志 儒行

一

宋

彭進龍字子龍精修勵行粹然有德君子也蚤通書詩業詞賦晚深於易禮四試國子監魁從遊甚眾成就名士不可勝舉時推為前郴守彭沂興國宰劉東父靜江彭拱辰國學士彭瀆秋官彭子與祈陽監酒劉希傳鄉貢士章貴彭談皆從學之顯者泰萬歷志萬姓通譜

按萬姓通譜載彭進字子龍縣志載彭進龍字子龍似屬二人然詳觀兩傳事蹟俱同惟通譜較備其為一人無疑故泰用之賀弁字德成幼慕聖賢學尤工詩大為蘇黃所稱賞奉母隱居龍溪時稱為菊軒先生郡城詩人堂祀杜叅軍以下弁其一也後

從祀鄉賢祠

泰萬歷志解縉詩人堂記

張湘博學善古文尤精於易晦庵先生嘗扁其齋曰玩易所著有
易解行世 萬歷志

明

賀守約字約東博學好古詩尤瞻麗元末遺老彫謝守約隱居不
仕獨以古學爲鄉邑倡學者傾嚮之洪武初薦授本邑教諭後
改光山學致仕 萬歷志

龍同仁字子元舉元至正鄉舉明興隱遯不仕洪武初縣令烏斯
道重其學行薦之朝授本邑訓導觀於薦者之賢而其人可知
已 萬歷志

永新縣志

卷十七

人物志

儒行

二

文魯麟性鯁直操履勁特善古文豪爽嚴正類其爲人洪武二年
千戶俞茂知州田盛交薦於朝 採萬姓通譜補

劉端字國正少孝友既長刻意勵行博涉經史每試必先諸士與
兄瑞竝有聲庠序甫艾卽退隱以經學教授鄉邑名士多所成
就性方嚴不輕假人辭色門人衣冠弗肅弗敢見也與邑老宿
張度陳瓚友善竝以學行稱尙書尹臺其外孫也 萬歷志

左收字宏用嗜學慕古比貢京師適劉瑾擅柄廷試四維五術收
對策正言無所避授丹陽訓導崇正學旌孝行一邑仰其教事
繼母撫異母弟曲盡孝友鄉閭誦焉收族孫元勳幼孤力學以
選貢爲宣平令調卽武教授迪士亦有身教之稱 萬歷志

尹爽字用晦年十七忽自奮曰不學何名爲人閉戶深研易理泛及諸史百家督學邵文莊見所試文稱爲國士命校白鹿書院經籍憲使沈公銳聞爽名以賓禮聘爲其子師歸時沈贈以詩有浩懷磊落官天地之句一時藩臬加禮重後貢京授吳縣學訓導士遊其門者咸知所嚮往嘗坐諸生柳下指喻進學之方門人懷之作教思亭以識不忘給事陸公燾爲記稱比召伯之甘棠焉起艱改於潛訓導同官有攜家後至者畏其舍多崇爽以己舍易之士服其正所著有竹莊集以子臺貴贈吏部侍郎祀郡邑鄉賢祠長子奎萬厯志

奎字崇文幼明敏爲文力追古法澹然不以世務擾心嘗與族黨

永新縣志

卷十七

人物志

儒行

三

舉鄉約興禮教風俗一新以貢授吳江學訓導申教約嚴課程逾年領鄉薦者九人陞諸暨教諭正身卒士一如在吳江日時邑令設屏於先師廟門輿過不下趨奎歎曰惡勞廢禮豈示民以敬乎立使人撤之尋卒門人私謚爲溇德先生萬厯志

顏應時字時行性剛介篤孝友母病癰吮之弗瘳哭之至咯血事兄甚敬伯父死爲理喪代償其負撫遺孤如同產以貢授常熟學訓導師範尊嚴士心歸服有石壁遺稿藏之家子鑰萬厯志

鑰字子啓嘉靖鄉薦授山東茌平學教諭在士鮮聞學鑰以王守仁良知之說誘之遠近翕從成就甚多張後覺其最著也擢新城知縣弛賦緩刑蝗不爲災改枝江賑飢平獄民愈悅服後歸

與弟鐸日以講學善俗相厲嘗捐餼脫同產於獄分俸給諸從昆弟之乏缺者人稱其有完行焉

萬曆志

賀應保字宏任少負奇氣工舉子業每試輒高等既而幡然曰制藝僅科名曠矢於天人性命之旨無裨也於是潛心理學遇省郡諸書院會千里必赴無間寒暑與盱江鄧潛谷南州章斗津安成王塘南劉三五劉瀘瀟諸先生共相參究獨有妙悟皆推爲畏友其於經史諸書無不淹貫著述甚富往往自出見解更辨晰三禮躬行實踐事母至孝及喪廬墓三年復祭田掩枯骨人咸稱爲篤行君子屢奉當道徵求所著傳家錄共省錄督學沈公下檄梓行更著有迂億迂議行世

康熙志

永新縣志

卷十七

人物志

儒行

四

周垣字翼微幼孤家貧矢志誦讀其舅氏安成劉瀘瀟試以文奇之就劉氏家塾學萬曆戊午以春秋領鄉薦授進賢教諭甲子四川鄉試聘校春秋房所取士成進士者居半爲人孝友敦篤每語及母死節事輒流涕及從蜀歸取所受聘幣哭告於父母之靈哀音悽惻人不忍聞所著有春秋解傳世孫謀中庚子武

舉任通州都司

康熙志

賀士昌字拙生爲文力追大家膺萬曆戊午鄉薦座主毛士龍器其方正誠篤每謂其可共患難後毛公忤魏璫捕之急士昌就試春闈遇諸途陰載其父子歸里匿深山中朝夕如子事父璫敗毛公復擢御史深服其大節毅然可以託國初授浮梁縣諭

日進諸生講學以仁讓廉恥相勗有朱應熊者家貧負才不遇
士昌資以膏伙勸令學薦之科舉朱因得登第尋擢江南滁州
守清潔慈愛滁人呼爲賀佛有大寇夜至關山士昌設方畧拒
之城賴以全及歸百姓遮道留之思其德建景行碑立祠於關
山關聖廟右至今祭享不替祀邑鄉賢 康熙志

蕭純字素樸少寄洪都常冠童軍爲文得酒益奇兩取副卷 舊志誤

領天啓辛酉選貢崇禎戊辰除漳州通判會島寇騷動海防層

公搜率純督師勝算居多子奎鳴隨征卒於軍 康熙志

賀日達字黃榆幼孤與弟選自相師以孝友著爲文力追先輩崇

禎 選舉志 癸酉歲貢授韶陽教深於易學歸里值荒年爲粥以

永新縣志 卷十七 人物志 儒行 五

食飢者人皆德之 康熙志

劉運號崇吾孝友天植性嗜古取忠孝節義有裨風教者與考亭
家禮輯爲成書居家浣花澆竹長吟自樂父母歿飲食幾廢歲
時忌日號哭失聲課子嚴甚每決試草得失不爽遇疑難事懸
度多奇中黃石齋大史詳誌其行誼以子光震貴贈中憲大夫

雲南洱海副使從祀鄉賢 康熙志

劉守誠號峯園載達子篤學力行與弟守洵嘗從鄒忠介講學青
原領萬厯己酉鄉薦授崇仁教諭陞廣東博羅令愛民下士會
水浸城守誠爲文告於神水遂退旣而羅浮盜起抵城下守誠
以忠義激民登陴固守城賴以全陞湖州同知 康熙志文學改

尹學孔字時卿受業王塘南先生授貴州藩幕時藩多古藏守吏相繼爲奸委學孔稽察吏賄之堅拒悉以古藏條列上聞徭人煽亂學孔備陳方畧兵民獲安臺撫薦之遷雲南景東府同知修學置田教養諸生而景東科第始盛均賦稅立義塚改折色土官之悍戾者亦就馴因病告休合郡建祠立去思碑歸家督修白鷺書院永隄及本邑學宮祀鄉賢

康熙志

江爾海字宏受不屑攻舉業師事劉元卿講求心性之學苦思力索頗得指歸後由成均選授鴻臚寺居京師名公卿皆愛其雅度乞養歸以書史自娛著有遊山水記亦名園詩集

秦府志康熙志

龍有珠字頌有貢士授攸縣令孝友慷慨喜周人之急歸隱於鳧

永新縣志

卷十七

人物志

儒行

六

村龍溪間鳴琴賦詩以自娛子科寶

康熙志

劉永綵字自白幼孤事母以孝聞尤篤友愛有鬻其公產至數百金不問也任山東荏平丞多惠政嘗白冤獄數事活數十人遷福州左幕去之日民爭奉酒炙涕泣攀留擁車轂不得行荏平南界僅三十里越三日始出境焉

康熙志

劉瑤字右化天資英敏究心理學與叔子裁師事徐魯元問良知之學瑤曰吾儒此心虛靈非同釋氏之空覺也必有躬行實踐之功見於日用彝倫之間魯元是之年九十卒文江李翰林振裕與其子僑生同鄉榜爲之銘其墓

康熙志文學改入

李斗字石雲善屬文屢試鄉闈不售嘗從忠介鄒公講學公問心

安有出入曰道心本無出入其出入者人心也公許之晚年隱
居家法醕謹教子弟以恭讓

康熙志

周之冠字元夫文謨子也父任固安令卒扶柩南還橐無遺貲而
動必申禮湯睡庵太史稱爲真孝子補邑弟子員以文見推尤
潛心理學躬行實踐鄒爾瞻深器之謂元夫非近時人殆黃叔
度之流與先後大吏多其父同僚冠屏跡不通謁駱公督學江
西恥以故人子進匿弗就試至其救荒化暴撫孤還金多長者
行時楚寇入境大肆焚掠過其廬相戒曰此周君子居也無敢
犯者著有訓世要言知非錄家規數十則子紹珠字伯召博通
經史鼎革後不復應試著有四書講義數十卷

恭康熙志禾川書

永新縣志

卷十七

人物志

儒行

七

尹先覺字長思號天愚才高學博以恩選入南雍每試冠軍萬厯
丙午舉應天鄉試與錢公謙益繆公昌期周公宗建方公應祥
稱同門莫逆交數公先後成進士而公三上不第乙卯公車卒
於雄縣道中士林惜之著有周易圖說祀鄉賢

康熙志文學改人

賀澄號松隱生平端方其學以王文成爲宗嘗有言曰聖學豈寂
守其知擴克之功無時可間由是躬行篤實有古人風自題其
堂曰松隱子析作孝思堂祀之御史李儼爲之記

康熙志文學改人

尹元櫓字槐山師事顏山農常稱其恬淡有和靖風有訓子詩云
青箱爲業產黃卷作家貲卒年八十四劉肩吾敘其狀子炯方

平燦俱有傳

康熙志

王學旦字景明家貧力學屢試弗售隱居山林以端方見稱於時
邑令閔公旌以彥方遺風舉爲社師堅辭不出邑人朱士景著
其狀尹燦銘其墓子親臣歲貢生 康熙志

劉廷諫字開美淹貫經史能詩古文辭與李於鱗相上下工舉業
萬厯丙午子司搜卷得之魁西江後授湘陰令多善政文江劉
兌陽先生稱爲三代以上人 康熙志

劉孟材字達卿性樸茂醇謹弱不好弄比壯有志於學出入釋老
間學跌坐觀心因拳屈成病聞劉養旦先生崛起雲陽遂往學
焉稍廢其舊業已又走安成謁劉瀘瀟先生先生甚重之賓之
家塾命其子姪就學瀘瀟嘗稱其爲師嚴爲友直云 採劉瀘瀟全集補

永新縣志

卷十七

人物志

儒行

八

周嘉善字慶甫後更名鐸因字振叔性醇樸然倜儻好行義爲文
不欲苦思惟意所適能時出醒人語受業劉瀘瀟先生門與雲
陽劉執甫坐卧小樓面壁觀心時聚同志互相切磋意孜孜不
懈居常侍二親定省如儀親卒哀毀泣血治喪一準之古振叔
故有異母兄逋公稅不能償官追逋甚酷家舊有囊振叔私發
肩潛以輸官事洩家督庭辱之振叔屈首受責曰吾權之久矣
與視吾兄斃杖下甯以身辱於家督而徐償所負也後輸之不
足又鬻己田益之其孝友之念懇惻委曲類如此 採劉瀘瀟全集補
甘仕可號若虛公亮子也邑諸生屢取高等不第受學於鄒文莊
劉三五兩先生之門子兩旣貴每戒家人毋倚勢壓鄉鄰詔兩

以義利之辨令毋失先世廉吏家法所居左右圖史手自藝名
香蕭然如僧舍有司罕識其面至聞同郡諸名賢講道青原復
真間則無會不至焉以子貴封御史採劉瀘瀟全集補

馬達號雲川世有勳閥少時折節讀書欲以此立功名及聞鄒文
莊劉獅泉兩先生傳會稽之學即往請業聞其緒言喜曰吾固
謂當有不可已者此是矣遂津津向往沉思力踐家故貧環堵
蕭然殊有自得之色間哦詩道其飢寒窮苦狀故人見之意其
求助相率捐金周之達揮去曰咈吾惟不苟取以至於斯也其
介如此丙戌邑中火延燒甚眾達所居左右盡化為燼獨至達
舍風返火熄由是譽益隆自郡邑長吏上逮御史中丞後先旌

永新縣志

卷十七

人物志

儒行

九

異之年八十六卒

採劉瀘瀟全集補

賀士龍字舒雲士昌弟家有詩人堂龍亦能詩不墜家聲篤行孝
友族黨服其行誼兄士昌滁州守子祖淦康熙戊午亞魁康熙志

蕭如祈字養吾太守樟孫也家貧嗜學邑知名士多出其門母喪
廬墓與鄉會立家塾族鄰化之子香寶領丁酉鄉舉康熙志

金士駿字子開五歲喪父事母至孝篤學嗜古為文動數千言鄉
鄰有急者周之難者解之慷慨無所吝家世沙溪因近城尋山
水佳絕處遷南村坐一室左右圖史日課兒以文行子映康熙志

生康熙志

龍球字二成經邦子天資穎異博通經史崇禎丙子取副卷與弟

瑄瑤躬行孝友色養數十年至老不衰兄弟析產互相推讓其
內行淳謹類此 康熙志

左國樞字啓虞少時家貧力學及長有餘財慕孔北海之遺風遇
墨客詩人招引入座與諸子談經論文常散金收書分給子弟
之能讀者子大鵬暉吉皆善楷草能吟詠 康熙志

國朝

賀靖國字忠矣順治甲午選貢第一爲文落紙如飛而詞義精湛
設教文塔一時名流如劉作樑作相徐有傑皆出其門所刻雁
塔社稿其課藝也張幹臣先生邀入京名公卿求詩文者趾相
錯事親菽水盡誠每爲父滌穢器人稱爲純孝著有冰雪堂集

永新縣志

卷十七

人物志

儒行

十

龍溪吟和李文正樂府

康熙志文學改入參禾川書

金璠字禮琮乾隆庚午鄉舉爲文雅健雄渾性剛介不阿每以禮
法繩人非衣冠不見客客非衣冠亦不敢見也任建昌學諭課
士綦嚴造就甚眾截取知縣以繼母年老乞養歸門人多爲詩
贈之有望高山斗之日 道光志稿

尹承敦字厚川性醇厚力學無間寒暑嘗讀書止水林寺中一日
家人送餽至敦據案且讀且點硯墨食之卒不自覺其專精如
此教人以植品爲先遊其門者多謹飭敦行之士乾隆庚午舉
於鄉丁丑春闈薦弗售卒於京詩文稿俱散佚士林惜之 道光志稿

黃元亮字駕斯號寅川以拔貢應廷試肄業北雍大司成歐公子

石期以國士在京六載交遊盡名流同鄉姚雪門彭芸楣尤稱
莫逆後歸以經學教授鄉閭成就者多性方嚴邑憲邱公延爲
西賓講讀外絕不干預他事選餘干論初至捐俸倡修趙公汝
愚胡公居仁祠復葺朱子講堂與縣尹定課程校士其中文風
大振王省崖學使重其行稱爲練達老成太守曲新安每語屬
僚曰黃廣文真今之古人也丁卯

恩賜舉人除撫州教授告歸卒年八十六

新增

賀瓊字玉峯號鶴汀乾隆壬申鄉舉考授內閣中書陞主事居京
十餘年與諸名流文章政事相切劘聲譽日隆京師向無新邑
會館瓊倡建南北兩館餘款留京生息致政時束金旋里按數

永新縣志

卷十七

人物志

儒行

十一

派歸四鄉纖毫不苟各鄉因之創建會垣試館人咸以爲瓊功
瓊學優行方學者仰之若山斗著述甚富惜散佚不傳

新增

劉聰泉字清池號相圃生而穎慧貫通經史訓迪後進成名者不
下五六十人生平慎居處寡言笑清介自持尤慷慨好義鄉邑
有善舉必贊成之文行爲一時推重晚以歲貢授宜春司訓卒
年八十六

新增

唐鳳翔字九霞號筠溪歲貢生性恬淡家貧授徒鄉里從遊者多
成就養親甘旨必具而自奉儉約至饑餓無少懟時邑侯張公
紹曾聘爲西賓戚好某構訟懷數十金求翔爲之誣諉弗受有
里豪慕其名欲交結之峻辭拒絕鳳翔博通經史著述多隨手

散佚存者惟桐鄉山房集藏於家

新增

劉可升字棣榮號階五嘉慶壬申鄉舉幼穎悟初授讀論語首章
卽請於師曰所謂學者學何事也師奇之長從龍補山張蘇門
兩先生遊學務實際爲文一稟先正少失怙事母孝屆丙子會
試母病戚友以是科大挑愆愆北上可升毅然曰豈以一官易
吾母乎自是家居養母課徒自給唐筠溪嘗稱之曰館穀以外
無錢讀書以外無事人以爲實錄云生平廉介不輕入公門而
遇事慷慨有勁節道光丙戌水災邑義士踴躍捐賑蠹胥某亦
願捐金三百可升斥爲盜泉率難民白於當道屏弗受其剛正
有如此者著有味古軒集若干卷

新增

永新縣志

卷十七

人物志 儒行

十二

李中孚字坦霞號風澤增貢生議敘八品父文杰性孝友嘗築保
母橋以祈母壽中孚爲學務實際與仲弟中旭相師友家貧效
賈逵舌耕師範端嚴善誘掖多所造就尤銳意作育邑秀水書
院及邑西聯珠書院皆中孚董成之爲人渾噩醜古而處事不
苟有鬻蟒衣者家人以賤值得之思奉爲壽中孚一見斥曰此
何物安知非賊中來者我死慎毋以此殮汚我蓋時值泰和土
匪亂後也其潔身類如此年九十卒

新增

徐鵬展字羽豐號圖南聰穎過人工書畫尤邃於易道光戊子鄉
舉年滿例授知縣弗赴性剛直常面斥人過雖貴介不少諱少
失怙事母孝以母苦節故採訪邑中節烈請

旌於朝復

倡修貞孝節烈總祠歲豐丙辰粵賊據邑城勒授偽職不屈以
憂憤成疾卒年七十四著有周易引行世 新增



永新縣志

卷十七

人物志

儒行

十三

永新縣志卷十七

文苑

南唐

張翊其先世為京兆人唐末翊父授任番禺屬劉隱將據廣南棄官北還至潭衡間馬氏已有潭澧挈家奔江南過邑僦屋居焉翊與弟惟彬善讀書克承父業高祖時徐知誥輔國政翊入廣陵以射策中第授武騎尉南唐禪代擢虔州觀察判官西昌令翊文辭婉麗禾山大舜二妃廟廬陵紫陽觀新興佛閣諸碑文皆翊所撰 十國春秋

禾川書按翊父儼居永新翊與弟惟彬俱由此發跡應歸人物

永新縣志

卷十七

人物志

文苑

志中縣志選舉條既載惟彬名而以棄官來寓為翊事列之寓賢誤矣今據吳志伊十國春秋更定

胡元龜少廉介有俊才嘗候邑宰宰見其風貌瓌偉欲窮其所學指屏間戲珠龍索吟元龜立成有翻身騰白浪撒爪攫明珠之句意蓋諷其貪也宰愧服後射策入官授文思房副使 人物錄

宋

何晝少讀書廬山白鹿洞初習進士業試南唐屢黜乃渡江謁宋祖陳所為書二十卷開寶壬申登進士第官至鳳翔觀察推官

以文章政事名 秦省志人物錄

張翔 人物錄 字陞卿別字元道博通經史嘗著斥蠹正言二書以

排佛老作元經圖以明五行六運之秘時名儒鄭獬吳處厚錢明逸輩皆師事之號白雲先生

人物錄

江暉字彥明工詩事母孝母嘗有疾暉攜筆硯坐床下進藥之餘吟詩自遣有晚春詩云鬪草事空猶昨日惜花心在又明年詞意甚婉美崇觀間吉守嘗以八行薦於朝不報自號轅陽居士與新淦詩人俞處俊友善有詩集傳世

參人物錄獨醒雜志

朱次雲字少游問學該博通五經尤長於聲律名噪一時領清熙己酉鄉薦爲梧州法曹所著有東谷樵唱

萬歷志

元

吳鄴宋末兵亂避仇轉徙山西易姓名爲張應珍自號義山示不

永新縣志

卷十七

人物志

文苑

二

忘其故土應珍以至元十三年由從事郎歷秘書監丞大德八年遷秘書少監九年復姓名曰吳鄴鄴深於經義註周易宗程朱而不爲苟同如參天兩地而倚數鄴以爲本義天圓而地方圓者一而圍三三各一奇方者二而圍四四合二耦似費擬議蓋五生數之中天數一三五凡參地數二四凡兩故聖人參兩之以倚數八卦之象乾坤天地以大虛言之也震巽天地之長男女爲雷風有氣無形坎離天地之中男女爲水火有形無質艮兌天地之少男女爲山澤有質確定矣其說頗有據元駙馬都尉高唐郡主闊里吉思嘗從之質疑刻其書於平陽路且詳其里居書藏秘閣

參元史人物錄

馮魯山字希元少受業於劉水窗博學能文嘗爲序綱目書法提綱挈領深契旨要水窗見之喜曰吾書法一部盡在是矣初魯山市書於肆得遺緋珠數十求其人歸之友人繫獄罪幾不測爲出數百緡得活終不自言其好義如此以子翼翁貴贈吉水

州判

採禾川書補

賀善號善堂幼穎異師事劉水窗先生水窗著綱目書法善深契微旨嘗自抒其所得爲綱目贊今史斷所引賀善贊是也

泰康

熙志禾川書

賀仲善字宗良祖士貴全茗州知州父元中澗郡照磨仲善少學詩於龍琴皋琴皋麟洲從子也授受有緒繼聞范德機楊仲宏

永新縣志

卷十七

人物志

文苑

三

之教於馮翼翁兄弟講貫益精元末授兗州路學正適兵亂不及之官隱居青原山著書自娛吉郡詩人堂仲善祖弁名列其中後圮仲善乃建於家示不忘其先也學者稱東里先生

泰萬

歷志解縉詩人堂記

按舊志稱仲善遊水窗先生門前後相距近百年殊誤今據解大紳詩人堂記校正

龍雲從字子高性曠達元末任福建儒學副提舉見時事日非歸隱林泉邑守將俞茂禮延之與雲陽李祁同列上賓祁文爲時所重而高以詩詞與之韻頡茂修東關浮橋成與賓佐同宴橋上子高酒酣卽席口占座客皆攜筆其警句云六丁運鎖駕長

虹百丈牽船挂飛鷁陽侯宮殿橫截開鼉舠鯨吞何有哉邑詩人自吳莘樂後首推子高云

人物錄

樊端可字正夫爲人曠達不羈少從龍麟洲遊書過目輒成誦詩歌清逸麟洲嘉歎之與龍子高友善嘗稱正夫爲畏友云

萬曆志

周謹字仲魯父子安以禮讓化其家一門孝友雍睦而謹尤好學工詩師事賢士大夫銳然有志於事業孟勤吳先生極口稱道其爲人且爲之別字曰慎初以勉其成

採禾川書補

明

陳宗舜字材民領元至正間鄉試乙榜魁授贛州路儒學教授明初典江西文衡洪武中與考會試賜宴殿廷所得多名士若解

永新縣志

卷十七

人物志

文苑

四

學士縉其一也晚家吉水文學爲遠近所宗

參人物錄萬曆志

按萬曆志稱宗舜爲元至正進士選舉志進士內未載今從人物錄改正

康以甯洪武間舉進士爲太平府推官謫居橫浦二十餘年著西游集解春雨序之謂其詩歌序記有得於邑先輩吳莘樂之遺緒其文不求工而自工可以追廬陵諸賢之盛

採解春雨堂集補

唐仲安性剛介明初以貢入成均會上臨雍問單于遺高后書史記諱而不載漢書列其詞孰是仲安奏對稱旨御題天下善說書唐仲安勅懸成均特擢工部郎中九年預修高皇實錄父金章贈奉議大夫

康熙志列傳改入

楊瑋字季真博通五經性狷介邑宰烏斯道以文學自任獨於季真加禮重時延請質疑季真素屏跡公門獨爲斯道屈人兩賢之瑋於星經地志尤所精究嘗取尺紙作廣輪圖山川曲折郡邑遠近如指諸掌人以古今圖牒較之無少異云

萬歷志

張同字祖年登天順進士授南京刑部主事歷員外郎爲人豪曠不羈宦不求達而善古文辭尤長於詩所著有岫雲稿

萬歷志

劉時字本升登成化進士歷官兵部郎中致政歸殫心著述文多奇思詩效西崑體有介石集人誦傳之

萬歷志

胡錦輅字大載少工詩善行楷爲人倣儻有高况不爲世塵所滓垢領宏治鄉薦入國學祭酒劉公震校其文加賞歎仕爲右府

永新縣志

卷十七

人物志

文苑

五

都事卒子玉嘉靖鄉薦除許州學正

萬歷志

徐慶衍字子芳少穎敏與兄慶鍾相師友慶衍領正德丙子鄉薦知涪安政通民宜憂起補貴池治聲遠騰適章聖皇太后梓宮南祔過其境慶衍行烈日中辨應致疾不起士民如失怙恃慶鍾負才不售晚好吟詠游情棋酒間不嬰外累自號草窗老人

年九十餘卒

萬歷志

金光弼字右辰號天擎生而穎異讀書日積寸年十二補弟子員善詩古文詞博通經史旁及百家其於古今興亡天下形勢星厯氣候山林兵策河渠園府方技稗說抵掌奮舌辨如決河會天下多故留心當世之務好談兵籌九邊事鑿鑿可見之施行

入北雍大司成傅公新德與語大驚曰有才如此困於縫掖吾輩端坐而稱師豈不媿哉內閣葉公向高張公位咸國士禮之才名滿天下惜年未五旬而卒不獲展其志著述數十萬言有功臣傳九邊考旁觀錄及金竺山房詩集湯臨川顯祖選刻爲之序學士施愚山重刊其詩集行世

康熙志

賀鳴祥字中白才學具足爲古今文辭綽有左國風與金光弼尹先覺賀中男周之望蕭廷鳴劉廷諫並著聲名稱爲禾川七才子數奇不遇以歲貢終生平所得館穀悉與兄弟共之不問出入太史蕭拙修劉孝則咸折節焉著有凌雲集

康熙志

蕭廷鳴字升叔少年補郡庠領萬厯壬子鄉薦與同邑賀青園同

永新縣志

卷十七

人物志

文苑

六

出章道卿門廷鳴學問淹博每數古今英雄成敗邊塞要害時務緩急汪汪千言若河漢而無極以夙望赴公車海內名流爭欲託交初授陳州教諭後署商邑事俱以清廉著聲卒於署其叔純判漳州兄熙鳴密縣令並以才學鳴螺江士子嘖嘖三蕭不去口

參康熙志水田居文集

周之望字非熊嗜古淹博領萬厯癸卯鄉薦杜門讀書絕跡公庭布衣疏食泊如也著作甚富爲兵燬僅存閩史行世

康熙志

賀奎章字中陽負奇才艱於遇嘆曰大丈夫自有千秋事業遂入山著書自號三一居士博通經史旁及諸子百家著仕學規要安成張鰲山先生序其集行世

康熙志

龍孔佐號角洲少孤事兄與嫂如父母博學力行弱冠有聲黌序郡邑士大夫講程朱之學能以一二言剖晰微義眾皆悅服尤重然諾慎取與書齋常題行己有恥四字以自警復訓其子振唐使常省覽萬曆辛亥以歲貢授廣東乳源司訓導遷英德令卒於官

康熙志

李長生字小年稱神童六歲能屬對八歲聽師講易乘龍御天義即問曰得非中庸之時中乎其穎悟類如此九歲應試學使張公京元見其易藝大奇之學使侯公廣成稱其文曲折微雋年

三十卒

康熙志

史訓字對南篤行好學師其兄見屏言行一以為法以選貢筮仕

永新縣志

卷十七

人物志

文苑

七

信陽州多善政弟詠文行亦如之以歲貢授當塗訓導後教授

鎮江及卒尹洞山公銘其墓

康熙志

李嗣晟字子忠號秋洞居琴亭為文清奇雄俊試輒冠其曹教授鄉里問奇者雲集所得館穀分潤伯仲尹洞山亟稱其品學邑侯龔石巖延修縣志陳一吾行政折余少源復古學皆與商確以歲貢授進賢教諭繼授南昌郡學當道大文字皆出其手掛冠歸里賦詩適志著有琴亭集落花吟秋洞記行世

康熙志

劉浚甫字茹白少負才名試輒冠軍領天啓辛酉鄉薦任四川新甯令居官慈廉新民德之掛冠歸囊無餘貲惟眉山升菴兩文

集而已

康熙志

黃學元字蒼舒號嘽嘽好學能文擬楚辭漢賦凡五十餘首同邑
金右辰見之亟稱曰此吾曹鼓吹也學元耽詩歌不屑攻制藝
年三十餘補弟子員鄒太史德溥劉太守鐸聞其名皆禮重之
與同邑尹方平劉光震胡中清汪宗濂結社時城東浮橋壞邑
令賦千金修復金被乾沒學元偕諸生白於鄧司李鄧詰令令
恚甚仇家乘間誣以他事褫其諸生服且欲置之死乃變姓名
入宜陽山中著天怪以自廣又著翼騷語皆淒涼無何令以大
計敗光震持其詩文示後令管公正傳管公立白其冤於學使
者乃復衣衿試卒弗售家益窘所居土屋頽垣陳書竈傍積灰
盈寸學元抱卷吟唔曠然自樂所著有嘽嘽子讀史隨筆及宋

永新縣志

卷十七

人物志

文苑

八

史私議若干卷

參康熙志水田居集嘽嘽子傳

李涵奎字斗暘邑諸生有才學屢躋棘闈著花萼集

節康熙志

湯宏字字襟以春秋領萬厯己卯鄉薦初授湖廣彝陵州教授聘
入南闈所拔多知名士丁公紹軾厯階宰輔餘亦顯宦後擢德
清令簿書之暇文酒自娛纂輯左史及里居生涯文集傳世

康熙志

尹方平字無界郡庠生品端方甘貧好學爲文敏捷每遇問難者
隨事辯晰無不當當道皆亟稱之龍泉郭中丞雲磯聞其名偕
入京方平爲條陳機務悉中肯綮欲薦以職弗受著有兩京遊
草又與兄炯共著易解四卷周禮輯要詩賦集行世

康熙志

龍補袞字無闕少艱於過寄籍貴州時同邑甘義麓任黔督學袞
呈牒求考郡士大噪拒之甘素憐其才而又難徇以私佯怒罵
曰子能七藝卽收子袞如命立成廿以示羣士士皆折服無敢
譁者遂拔之後以選貢入北雍中萬厯乙卯榜舊志誤作己卯授申江
令居官清正愛民禮士多善政人感其德如桐鄉之於朱邑焉
康熙志

賀邁生字元明幼能文心南沈邑侯奇其才厯試高等嘗刻試卷
問世名曰小言與同邑馬之驥賀吳生賀靖國王朝賢李小白
李長生金大韶結社稱新社八子讀書浮玉閣交勉於學慨然
曰功名由天制之道德文章人自爲之非天所得制之也蓋其

永新縣志

卷十七

人物志

文苑

九

以學行相高不馳驚於聲華卽此可見其概矣節康熙志

吳鳳翼字子飛性閒靜博通經史尹公長思稱其有五柳先生風
構書室於仙溪洞口與里中郭萬里劉齊珠周天球讀書其中
晰疑賞奇文行並有成就郭萬里受知侯廣成先生著有和雍

堂集康熙志

周祖亮字四通邑庠士性剛方篤學謹行癸未張寇過邑身被數
刀幸得不死邑侯黃公受封聞而憫之資以藥餌嗣益發憤讀
書寒暑不釋卷年九十終子振元領戊午鄉薦康熙志

曠遠字若谷文筆縱橫莫可控制邑侯管公亟稱之刻禾川六子
稿遠其一也數奇不偶晚年一觴一詠怡然自得邑士大夫高

其節 康熙志

李川寶字眉石少好莊列爲文自闢蹊徑閱者咸驚異之邑令管公正傳一見擊節謂禾川才士雖多而幽奧奇險未有如川寶者數奇不偶晚年高冠篳衣居山谷間非其人不與通知己者雖遠必數相過所著易隨十卷義本程朱而自出新意發人所未發與賀貽孫賀吳生黃學元曠遠馬之驥稱禾川六子卒年八十一 康熙志

賀鳳生字千仞父廷宰性至孝鳳生受庭訓穎異過人日誦數千言試輒冠軍領崇禎己卯鄉薦爲人慷慨有氣節遇邑大利害敢言不屈憐才好賓客曾脫人於難明季閉戶著作於聲利泊

永新縣志

卷十七

人物志

文苑

十

如也詩律晚益細有至菴三集行世子是有傳 康熙志

金如輪字轉日幼聰慧九歲通書易兩取副卷 舊志誤嘗設帳吳

楚間從遊者甚眾與弟曙先相師友旁搜廣覽共著觀感錄周

易通解如輪崇禎己卯歲貢曙先順治辛卯恩選 康熙志

賀吳生字季子髫年號奇童與族叔貽孫邁生應縣試沈侯心南

有一姓三才子之目天啓甲子幾冠西江因大結傷時抑之吳

生意氣自豪文益閱肆詩則古風仿儲王律體追三唐貽孫嘗

推爲近代名手比明運盡與貽孫偕隱識者以竹林二阮擬之

入其室惟清風明月因自號兩間居士所著有名臣錄靜觀堂

集湖隱堂詩集 康熙志禾川書

李其昌字君求爲文淡折古雅曾公堯臣選吉州合社刻其稿等
講學依仁書院其昌講萬物皆備章語契旨文江李忠文公深
器之生平孝友族人以爲矜式 康熙志

徐昶字仲升爲文高卓得力黃石齋稿督學三首拔之與王新吳
季常汪宗濂結俟雲社遊其門者如賀嘉選盛士賓等皆知名
士著有易經義疏 康熙志

尹啓殷字小尹宗伯臺曾孫也甘貧博極羣書負才能詩文兼善
騎射中崇禎己卯副榜敦孝友重交遊慷慨激烈癸未楚叛將
杜龍曹天衢等以兵萬餘圍城七日不解城幾陷啓殷請於邑
侯夜繼而出詣兵壘反覆開諭危城以全邑人德之所著有素

永新縣志

卷十七

人物志

文苑

十一

齋稿

康熙志

賀肇鵬字搏南號寶善師事劉石潭先生明經術尤邃於易好爲
閎肆之文詩詞援筆立就年十五遊邑庠有聲黌宮子彌能讀

父書樂施不倦

康熙志

龍鱗字介甫能文善楷草癸卯副卷讀書柏窗著就正草

康熙志

江孔殷字荆濤邑廩生剛方慷慨凡邑中大利害敢言興除著有

問心軒稿取壬子副卷

康熙志

劉雷奮字濤聲博學正直壬子取副卷著四書題義半衲詩集

乾隆志

隆志

按龍鱗江孔殷劉雷奮舊志俱稱副榜考明代初未有副榜惟

崇禎十一年己卯有之其餘稱副卷不列榜今改正

李璿字培荀以易傳家族子三才純如寶得其宗號曰李氏一家

易 康熙志

賀覺字予將多著作隱於荷溪門人龍因菴為刻荷溪集 康熙志

周菩珠字崑山事母以孝聞幼能詩博通經史試輒冠其曹邑人

周映奇傳其遺稿 康熙志

吳季常字卓儒文行兼優仗義除叛邑人多之 康熙志 儒行政入

賀垂裳字君錫事節母顏氏以孝聞長於詩著有遵素集 康熙志

劉子預字蘇門號杜公萬歷壬子 舊志誤 作乙卯 亞魁清操嗜古文行為

一時所仰鼎革後與族生三瑞三琦一濬隱居不出時兵戈擾

永新縣志

卷十七

人物志

文苑

十二

攘己丑

舊志誤 作己酉

六月遇亂兵子預與三瑞等俱被殺遠近咸悲

之 泰康熙志 禾川書

賀穉圭字孚尹幼聰穎博極羣書言水劉文忠深器之字以女孫

乃益自刻勵吟詠不輒貽孫見之謂有陶家風味惜不永年有

眠雲館詩集同學餼梓以傳葉鄒山為之序 禾川書

賀穉恭字壽男少習舉子業侯學使以名駒稱之穉恭亦自命不

凡顧數奇十試不售發憤抑鬱自號散木子著有閑閑吟以歲

貢終 禾川書

顏志道字海襟著有春秋正解 康熙志

賀時清號秀螺著有字辯綠野草 康熙志

金宗珠字維城邑廩生博學有奇才著有文稿邑令黎序之康熙

劉帝則字叔豹積學工文著有太平廣錄左傳考錄四書晰要統

核行世古安盧志

陳宗祿字在中博極羣書而尤邃於易明末一意著述以裁成後

學為己任著有義山樵歌三卷易經極說八卷副使劉光震為

之序節乾隆志隱逸改入

附載八人

左嗣穎字毓恬 左右明字小熙 尹宏詞字恆沙

曠秉旦字養齋 左序生字自新 尹炯

龍之虹由貢授溥州諭 俱康熙志

永新縣志 卷十七 人物志 文苑 十三

賀文焯庠生子是培亦有文名 乾隆志增

國朝

龍三汲字禹門領順治辛卯鄉薦澹泊自甘性孝友偕兄弟力學

養志伉直有氣節遇大利害能建言為文辭藻駸舉有推倒一

世氣概人方期其大用惜蚤世 泰乾隆志禾川書

尹燥字慈明少穎慧有文名屢拔優等順治丁酉以易經中魁生

平伉直遇邑利弊事倡義建白如建文塔修學宮其功最多 康熙

熙志

尹膺聘字選公強記博聞工制藝每試拔前茅志氣豪上不可

一時之概順治甲午舉於鄉數上公車弗售賫志以與人共惜

之康熙志

賀楠字豫良砥礪廉節為文淹博古雅初應童子試王公登錄大奇之曰萬選錢也康熙丙午以策論領鄉薦

康熙志

劉頊字顛孫才高識卓為文浚折幽素風流綽約有歸季思徐思

曠之風顧偃蹇厯落屢試不售更為簡練揣摩之文著聞籟閣

制藝行世賀子翼葉鄒山序之

採禾川書補

賀善來字僧護中男子父沒年未弱冠哀毀骨立時僑居西昌甚

為曾堯臣蕭伯玉兩先生所器文江劉公孝則李公懋明劉公

石瑕咸相引重令其子弟與之遊服闋歸就試侯公廣成拔補

弟子員善來天資穎異藏書萬卷不數過即得精微胸無俗韻

永新縣志

卷十七

人物志

文苑

十四

尋常語出其手便覺清風襲人尤善尺牘敘致婉暢翛然標致

所著述亦然迨鼎革後扁戶深居非其人不與處歲應貢以老

病辭年七十二卒著有文集若干卷藏於家子朝任

恭乾隆志
禾川書

朝任字尹后邑諸生幼聰穎屬文清矯不羣家貧落拓浚意功名

遊幕齊魯燕趙闔越諸名勝足跡幾遍著有太平獻曝筮仕忠

告義方補遺諸書一得偶存集八卷

採府志補

陳宏圖字東山一字聖則父元倫詩酒自娛自號柳溪居士宏圖

能讀父書遭甲寅滇藩之變貧無以自存遂棄舉子業習刑名

錢穀熟識當世之務遨遊四方幾二十年著有苦苦海草一炬

集觀海集東山雜著卒年七十八

節乾隆志

江海甯字指靜邑庠生幼穎異讀書等身善屬文千言立就性慈
惠橫逆之加絕不與校同房軍民兩役繁重獨以身支復遭寇
亂家貧如洗泊如也惜中年不祿以長孫右臺貴贈奉直大夫
節乾隆志

賀偉字選子宋詩人菊軒公後博貫經史尤長於詩刊有二益齋
稿爲人純謹端介矜式鄉閭老於諸生士論惜之稱爲逸菴先
生孫毓傑邑庠生 乾隆志隱逸改人

賀是字坦菴性洒落不羈以文酒自娛試輒冠其曹刺史劉公是
齋深器之所著有雁宕紀遊奚囊摘句可留集 探府志增

賀泰生字幼襄八歲能文十二補弟子員與施愚山講學青原白

永新縣志

卷十七

人物志

文苑

十五

鷺書院士譽歸之著有省菴文集竹圃詩草

乾隆志

胡光溥字博先少攻制藝愛知於督學吳石渠文名蔚起以數奇

屢困場屋卽棄舉子業深研易理與李謙菴劉木生輩參究心

性之學獨得悟解著有原道大極諸論

採蓮花廳志補

賀涪號鈍菴原名宏道穎敏絕倫博通經史工詞賦年十六餽於

庠臨川李穆堂先生主講秋山書院甚奇之所選秋山課藝多

涪文性謹厚人稱涪翁著有鈍菴稿行世李穆堂爲之序 節乾隆志

劉森字一棣號帽山幼食貧刻意力學不假師授與人角藝頃刻

立成有風馳雨驟之概善懷素書法酒酣一揮百幅更入神妙

求者屢滿戶外領康熙辛卯鄉魁考授中書著有木林居集金

峰合稿易訂四書訂帽山文稿半幅箋諸書于世衢乾隆志

世衢號何甫早負才名讀書豫章書院張損持太史深器之雍正
五年成進士改臨江教授尋補撫州造士俱有方生平潛心纂
述有補繫範數滿香齋筆花吟 採禾川書增

葉擎霄字蒼平號鄒山少受業於徐昶才敏學富詩古文直造古
人堂奧爲人慷慨有大志遇邑利害敢建言甲申漕米新派又
改察院司爲鎮署將屯兵三千於城內擎霄偕同學叩轅籲請
乃得免晚訓虔州聲教卓著後以老致仕卒於家有詩文二卷
黎公士宏序之同時有葉上聲者 工詩歌

嘗過洞庭湖賦七律二章茶陵譚紹琬刊載湘陰志中 採禾川書增

永新縣志

卷十七

人物志 文苑

十六

周三汲字滄際號瀾軒少穎異刻苦勵學酷嗜左史莊騷今古文
詞俱能自闢堂奧四方來學者經其指授作文皆有法臨川李
穆堂掌秋山書院一見交驩以斯文相屬由選拔聯捷成進士
惜遇晚不獲竟其所施著有學庸講義五經標旨南華摘奇讀
史纂要詩賦雜著五十四卷門人蘇作睿刊其四書文行世 參

乾隆志禾川書

劉之藩字西翰號牧者稱神童博涉經史康熙癸巳以禮經魁西
江每舉陸象山喻義喻利之旨示後學六上春官不第譽益歸
之晚著河圖難對十卷西林瀟湘讀史問居等吟與兄之蘭極
友愛之蘭字幹三恩貢生潔介自持謙恭下人時稱一汪一狷

晚教授里中多所成就著有易經講義四書家課

參乾隆志禾川書

龍體剛字鐵芝號牧州甘貧好學工詩古文詞居嘗敦信義不輕進退值滇藩之變室家飄搖乃走京師以國學考授州同遍歷大江南北與當時賢士大夫交遊多資其碩畫研衡古今所至題詠不絕半窗詩集皆紀遊作也黃鴻中學士爲之序稱其有三唐風致詩畧詞畧策畧雜畧皆可爲世寶筏而其發前賢之扁鑰作後學之津梁莫最於史畧今俱刊行

參乾隆志禾川書

譚毅字恭士工詩文粵西荔浦令許公之豫馳書數千里聘主書院講席所示諸生書徃復諳切生平敦行誼在豐城傾囊救溺人咸傳誦之以不工書屢試弗售兵憲會旅菴欲代薦之不屑

永新縣志

卷十七

人物志

文苑

十七

就所著寸玉集散人浪草孫尙清尙書刊行

乾隆志

盛逢春字甸熙少秀特與弟逢瀾受業於李公穆堂刻勵奮勉屢爲當事所賞拔李公開府粵西聘名流分纂通志逢春獨任八類縷晰條貫未十旬已卒業眾服其敏總制鄂公彌達欲延師課子甘大冢宰汝來以逢春薦鄂公見其學行雅重之駐劄肇慶統鎮甯古塔皆邀與徃總制三楚復聘爲漢江書院山長逢春長於詩身行萬里所見山川名勝故壘殘墟長吟短咏意氣迢上以明經爲建昌學博終

採禾川書增

李錫字四韓以大學生遊學京師數奇不偶日以著述自娛所作皆平正通達居家喜興舉嘗疏濬黃土灘柏文水利築隄遏漲

清復田畝又築石獅陂募工鑿巨石成堰以資灌溉里人便之
所著有讀史雅說四卷讀子語二卷課兒語一卷雜語一卷鍾

山堂詩草二卷 府廬志

江右臺字南瞻號斗山以五經中雍正丙午副車是科各省以五

經申副車者 特旨在作舉人右臺與焉後授貴州知縣撫

軍重其學行聘掌貴山書院造就甚眾署 貴州知州致仕歸

子承祖乾隆乙酉舉人 道光志稿

江慕柳號碧山性孝友刻意勵學補諸生後 謝謝客者三載雍

正癸卯舉於鄉粵閩二省聘為鄉試房考官所得多知名士粵

西榜首辛君昌五其尤著者丁巳會試登明通榜授宜春教諭

永新縣志 卷十七 人物志 文苑 十八

整飭學規尤喜獎拔寒儒家貧能自樹立者每俟助之解任後

門人為製去思碑陞江南石埭知縣 道光志稿

尹掄字梅吉號洪川尚書臺四世孫乾隆辛卯副車少負奇姿為

文有先輩風力耄猶好學族子弟有俊秀者輒獎成之著有明

辨錄檢雲齋文集洪川文稿卒年八十五 新增

尹光榜字元士號愍齋援 例授章邱縣丞博學能文尤工書畫

著有鉄如意稿四十九卷元音片釋二卷 新增

龍亨繡字彰五號補山幼負奇才年十三入郡庠旋食餼受知於

王肅堂郡守召入署命從吳閩林先生學先生刮目焉同學如

姚公頤郭公縉光王公用儀皆自謂不及肄業鷺洲書院主講

彭芸楣周定齋兩先生屢拔置第一文名藉甚乾隆癸卯歲貢
戊申以第五人舉於鄉主司趙鹿泉評其文有大力文止風規
性迂闊不諳時務惟嗜古寒暑不輟故爲文能達古人堂奧晚
授峽江教諭卒於署著作甚富惜多散佚新增

吳仁字皆春才思敏捷家貧力學與左坦齋賀鶴汀交皆推爲畏
友乾隆丙子舉人授教諭歷任鄆都石城學所至文教振興士
人誦之著有易經註解道光志稿

劉垂域字介峯恩貢生幼穎異甘貧力學數奇不偶人咸惋惜之
主講廣豐書院門徒多顯達者晚授餘干教諭告歸著有尙
書經解卒年八十九道光志稿

永新縣志

卷十七

人物志

文苑

十九

譚尙書字述唐號璧堂歲貢生生時父夢人贈以蘭及長穎悟異
常嗜學不厭博覽六經子史百家書尤好著述沈芸椒學使稱
其有古作者風乾隆間纂修邑志考核未精尙書搜求古籍網
羅舊聞作禾川書以訂其訛至今得所參稽晚膺新途訓導造
就甚衆年八十卒於官著有春草堂集偶見集補正吉安秩官
表補正江西秩官志讀史一得東遊草南歸草金川自課永嘆
草所好集弟尙禮以歲貢授建昌訓導亦以文學名著有春秋
集解六可齋詩鈔新增

左南華號屏岳由副貢中乾隆戊子鄉舉博極羣書尤得力於左
史主講秋山書院一時英俊多出其門邑侯唐奉委調簾會重

修滕王閣成中丞令僚屬依韻賦詩南華代侯作有唐代文章
踞上頭之句中丞大加欣賞推唐侯爲首座晚猶好學不倦年
八十餘選贛縣教諭卒 新增

陳文瀾字觀可乾隆乙酉舉人性謙冲操守甚嚴居負郭未嘗輕
入城市授都昌司訓歷署安遠萍鄉等學督課諸生循循有法
晚年家居惟以吟咏自娛 道光志稿

陳泰來字天倬優貢生好學不倦尤敦行誼教人以植品爲先從
遊者皆知所嚮往著有寅甫詩文集 道光志稿

左三賦字衍思幼穎異試輒冠軍學使金公奇其才惜不遇而卒
邑侯陳公尙贊爲之傳有禾陽柱石之句 道光志稿

永新縣志 卷十七 人物志 文苑 二十

唐志鵬字敬行邑廩生性孝友事寡嫂如母爲文湛深經術與同
邑劉階五唐筠溪相友善往來講論互相切劘家貧授徒善引
誘師範尊嚴有不率教者卽揮去之故成就甚多卒年七十餘
新增

段霖字右親號澍泉性穎敏過目成誦博涉經史尤酷嗜春秋三
傳授徒爲業訓導有方耿介自持絕不干外事晚以歲貢授建
昌府訓導未赴任沒年八十有三著有春秋會要稿 新增

陳兆熊字覺民號吉齋嘗從左屏岳黃寅川兩先生學皆目爲大
器以古文受知於翁覃溪學使自是益肆力詩古文辭授徒鄉
里遊其門者多成名性剛正潔己好善遇邑義舉輒毅然董成

之與同年趙侯菊郵往來最密納不干預訟事王公珏堂蒞邑
少許可獨於兆熊加禮重以拔貢選星子教諭兩監白鹿洞院
事倡復前山魁星亭士人誦之年八十一卒所作詩文隨手散
佚新增

田瑞河字立徵歲貢生敦孝友學問淹雅而艱於遇應乾隆壬午
鄉試房考李公翔麟力薦再三卒不售以所學教授鄉閭從遊
者通顯甚衆如賀祥珠賀光譚尙迺尙書左南華輩乃其最著
者姪璵寶乾隆癸酉拔貢孫崇禮歲貢生皆著文名泰道光
志稿

賀長崙字濟高中男元孫年十六始力學一旦豁然解悟別有心
得爲文新雋不落凡窠乾隆庚寅鄉舉道光志稿

永新縣志

卷十七

人物志

文苑

二十一

龍逢原字則右號淇泉力學嗜古應童試作五代史得失論程松
亭學使大加賞識首拔之道光己酉舉於鄉性至孝嘗輯孝友
錄以勸世倡建四教書院與鄉人士講習其中多所成就著有
自得居存稿新增

林魁選字香南號梅臣道光癸卯鄉舉弱冠能文肄業秀水書院
受鄭邑侯知屢拔置第一性孝友授徒養親嘗分館穀以贍諸
弟之貧者任建昌教諭課士有方丁憂歸門人送之多泣下連
年主講永甯龍江書院沒後從遊者懷其教思於書院立主祀
之所著詩文藏於家新增